

45-bob. Bojxona to'lovlarini hisoblab chiqarish va to'lash

322-modda. Bojxona to'lovlarini hisoblab chiqarish uchun asos

Qo'llaniladigan stavka turlariga bog'liq holda bojxona bojini, aksiz solig'ini va tegishli bojxona yig'imlarini hisoblab chiqarish uchun tovarning bojxona qiymati va (yoki) uning miqdori asos bo'ladi, bundan qonun hujjatlarida nazarda tutilgan hollar mustasno.

Qo'shilgan qiymat solig'ini hisoblab chiqarish uchun tovarning bojxona qiymati, to'lanishi lozim bo'lgan bojxona boji summasi, aksiz to'lanadigan tovar bo'yicha esa, to'lanishi lozim bo'lgan aksiz solig'i summasining yig'indisi asos bo'ladi.

323-modda. Bojxona to'lovlarini hisoblab chiqarish tartibi

Bojxona to'lovlari deklarant tomonidan hisoblab chiqariladi.

Bojxona to'lovlarini hisoblab chiqarish O'zbekiston Respublikasining milliy valyutasida amalga oshiriladi, bundan ushbu Kodeksning [66-moddasida](#) va boshqa qonun hujjatlarida nazarda tutilgan hollar mustasno.

324-modda. Bojxona to'lovlari stavkalarining qo'llanilishi

Bojxona to'lovlarini hisoblab chiqarish uchun:

bojxona organi tomonidan bojxona deklaratsiyasi qabul qilingan kuni amalda bo'lgan, bundan ushbu Kodeksning [172](#) va [325-moddalarida](#) nazarda tutilgan hollar mustasno;

bojxona rasmiylashtiruvi bilan bog'liq bo'lmagan bojxona to'lovlarini to'lashda bojxona organi tomonidan harakatlar yoki tartib-taomillar bajarilgan kuni amalda bo'lgan stavkalar qo'llaniladi.

325-modda. Tovarlar bojxona chegarasi orqali noqonuniy olib o'tilganda yoxud belgilangan talab va shartlar boshqacha tarzda buzilganda bojxona to'lovlarini hisoblab chiqarish

Tovarlar bojxona chegarasi orqali noqonuniy olib o'tilganda yoxud ushbu Kodeksda belgilangan talablar va shartlar boshqacha tarzda buzilganda to'lanishi lozim bo'lgan bojxona to'lovlari:

belgilangan talablar va shartlar buzilgan holda bojxona hududiga olib kirilgan va bojxona to'lovlari to'lanmagan tovarlarga nisbatan — bojxona chegarasini kesib o'tish kuni amalda bo'lgan stavkalar, agar bunday kunni aniqlashning imkoni bo'lmasa — shunday tovarlar aniqlangan kuni amalda bo'lgan stavkalar bo'yicha;

noqonuniy olib chiqilgan tovarlarga nisbatan — bojxona chegarasini kesib o'tish kuni amalda bo'lgan stavkalar, agar bunday kunni aniqlash imkoni bo'lmasa — shunday faktlar aniqlangan kuni amalda bo'lgan stavkalar bo'yicha;

tranzit bojxona rejimida olib o'tilayotgan yoki bojxona nazorati ostida saqlanayotganda yo'qotilgan, yetkazib berilmagan yoki bojxona organi bilan kelishilmagan holda berib yuborilgan tovarlarga nisbatan — tovarlar tegishli bojxona rejimiga joylashtirilgan kuni amalda bo'lgan stavkalar bo'yicha;

shartli chiqarib yuborilgan va bojxona to'lovlarini to'lash bo'yicha imtiyozlar berilgan maqsadlardan boshqa maqsadlarda foydalanilayotgan tovarlarga nisbatan — bojxona organi tomonidan bojxona deklaratsiyasi qabul qilingan kuni amalda bo'lgan stavkalar bo'yicha hisoblab chiqariladi.

326-modda. Bojxona to'lovlarini hisoblab chiqarish uchun chet el valyutasini qayta hisob-kitob qilish

Bojxona to'lovlarini hisoblab chiqarish uchun chet el valyutasini qayta hisob-kitob qilish:

bojxona rasmiylashtiruvi amalga oshirilayotganda — bojxona deklaratsiyasi qabul qilingan kuni;

to'lanishi bojxona rasmiylashtiruviga bog'liq bo'lmagan bojxona to'lovlari uchun — bojxona organi tomonidan harakatlar yoki tartib-taomillar bajarilgan kuni O'zbekiston Respublikasi milliy valyutasining O'zbekiston Respublikasi Markaziy banki tomonidan belgilangan valyutalarning rasmiy ayirboshlash kursi bo'yicha amalga oshiriladi.

Tovarlar vaqtincha olib kirish bojxona rejimiga joylashtirilayotganda davriy bojxona to'lovlarini hisoblab chiqarish hamda tovarlarni quvur transportida va elektr uzatish liniyalari orqali olib o'tishda bojxona to'lovlarini hisoblab chiqarish uchun chet el valyutasini qayta hisob-kitob qilish ushbu Kodeksning [66](#) va [172-moddalariga](#) muvofiq amalga oshiriladi.